

欽
定
全
唐
文

欽定全唐文卷八百五目錄

高墉

龍華寺窣堵波塔銘

并序

裴鉶

天威徑新鑿海派碑

陳庶

聞韶賦

蠡山廟狀

韋昭度

元中觀瑞石賀表

又賀瑞石表

請復李克用官爵表

韋蟾

請禁託故請假奏

郎肅

甘泉普濟禪寺靈塔記

柏虔冉

新創千金陂記

王武陵

宿惠山寺詩序

吳畦

唐贈左散騎常侍汝南韓公神道碑

欽定全唐文卷八百五

高墉

墉咸通時布衣

龍華寺翠堵波塔銘

并序

天性本聰敏執心謙沖推善讓人曾不自伐事鄉曲乃鄉
曲欽承理家道而家道篤睦者厥有周文王毛公苗裔國
內國崇之昆季也仁孝並舉義讓克修雖古高柴田真難
可將比焉祖立職轅門妙閑弓矢正直在己匡救邦家吾
君賞其勲勞延及後嗣父敬承先祀相紹無差上令下從

罔墜基緒書曰功加於時德垂後裔斯之謂歟暇日昆季
議曰阿翁遺意保厥孫謀衣食粗充心思上報旣而上下
協睦同望勝因乃召匠選石施功琢削磨礱旣就崇宰堵
波是日功終立於營所其地則北視橫山南鄰畢陌東西
逾遠故號洪川意望將此勝因資及七代先靈并亡兄弟
妹等願神識不昧得覩真容彌勒佛前親承聖旨現存孫
息眷屬等福樂無窮壽等青山福同滄海願法界眾生普
霑此福乃爲銘曰

天雖高兮尺寸可知地雖厚兮里數可期海水深兮毛滂

記之大地廣兮微塵無遺鳥兔交兮四時有盡立宰堵兮
福布無涯

裴鉶

鉶咸通中爲靜海軍節度高駢掌書記加侍御史內供奉
後官成都節度副使加御史大夫

天威徑新鑿海派碑

巨浸無涯接天茫茫狂飈捲蹙駭浪屹起若流堆而走雪
岫瞬息萬里皚皚然縱天英之神威亦不能抑遏其勢長
鯨憂其蹭蹬巨鰲困其擺闔水族之偉者尚不得安況橫

越之舳艫焉能利涉耶卽摧檣裂帆覆溺而不可拯有之
乎今天威徑者自東漢馬伏波欲剪二徵將圖交趾煎熬
饋運間濶滄溟乃鑿石穿山遠避海路及施功用死役者
不啻萬輩竟不遂其志多爲霆震山之巨石自巔而咽之
伏波無術不能禁乃甘其息自唐皇有三都護其舊跡俱
沒欲繼其事遂命疊燎沃醢力殫物耗踵前功而不就又
各殞數千夫積骸於逕之畔邇者無有敢議其事者自僕
射渤海公剪蕩蠻夷跨踰滄漲削平交趾克復郡城錯磨
鋌及駐軍卒伍然運粟走食尚阻洪濤召術徵謀未閱長

策渤海公曰我再有丹徼重關皇風聚兵安人須便於事
遂命攝長吏林諷湖南軍都將余存古等部領本將兵士
并水手等一千餘人往天威徑而疏鑿之渤海公諭之曰
天道助順神力扶直今鑿海派用拯生靈苟不徇私何難
之有前時都護乃犒師不至持法不堅博約營私人須怠
惰今我則不然只要濟其王事耳諷等遂唯而去自咸通
九年四月五日起手操持鍬鍤豐備資糧銳斧剛鑿刊山
琢石是石堅而頑盤而厚併手揭折聚力鑄槌逾月之間
似欲開濟但中間兩處值巨石嶄嶄焉繚亘數丈勁硬如

鐵勢不可減鑿下刃卷斧施柄折役者相顧氣沮手柔莫能施其巧矣至五月二十六日當晝忽狂雲興怒風作窺林若瞑視掌如瞽俄有轟雷燐電自勵石之所大震數百里役者皆股慄膽動掩聰蔽視移時而四境方闢眾奔馳視其艱難之石倏而碎矣或有磊磊者落落者約人而不能舉俱爲雷之攫拏擲於兩峯耳又其西堅確之石至六月十一日後大震如初霆雷之赫怒迅烈復愈於東之所震者眾復驗之是日以磨泯若有所失旁之盤陀者亦碎裂數十丈又其西復值巨石亦不可措手工人息攻皆仰

恃穹昊意有所待復興雲雷又大震巨石乃墮裂有泉迸
出味如甘醴此乃乾坤拯助造化扶持迴換艱難一瞬夷
坦皆渤海公心無私契精貫上元使列缺之與豐隆矜神
功而誇妙用風雲接助增益勲庸感應如斯古無儔匹遂
使決洩一派接引兩湖中間合流無纖阻窒經過卒校梯
溟漲而不艱危趨運倉儲棹舟航而無覆沒凡涉交趾履
險之處昔如履冰宋洞沙之鏵背耕其淪漣女漚灣之石
頭湧其沸騰大蒙神之山脚蹴其洶涌舟人所厯毛髮自
寒今則安流坦途不復經斯險矣於戲渤海公之功績與

鑿汴渠開桂嶺可等肩而濟其寰區耳諷與存古勤潔奉
公精專辦事指麾之外更能審曲面勢伐山徵材結構高
亭創修別館泉驅來而走碧橋架險以橫虹神室雷祠道
堂僧署無不克備皆能顯宏至其年九月十五日畢工諷
存古等堅請刻石紀次以示曠代渤海公從之因命於掌
記直書其事鉤謬當秉筆不敢退讓銘曰

天地汗漫人力微茫渡危走食冒險駕航脫免者稀傾沈
是當我公振策勵山鑿石功施艱難霆助震激洩海成派
泛舟不窄渤海坦夷得餉我師天道開泰神威秉持

陳庶

庶揚州人工畫花鳥

聞韶賦

以宣父在齊三月忘味爲韻

韶則盡美聽何可忘況至德之斯過聆奇音之孔揚天縱多能信以嘉乎擊拊神資博學知具美於典章用而不匱樂亦無荒若充乎四門之術不離乎數仞之牆驗則足徵用之可貴聖者妙而合道志者仰而自慰悅五音而肆直孰謂其聾致六府之和平自忘於味省風而八風叶暢觀德而九德昭宣季子慙遊於魯地穆公徒饗於鈞天曷若

觀率舞聆薰絃變態固已周流自然可以深骨髓而期富
壽豈徒資視聽而娛聖賢至若清磬虛徐朱絃疎越鼗鼓
以之迭奏笙鏞於焉間發以感陰陽於宇宙耀光明於日
月自表虞德之不衰豈効文王之既歿是知武也未善護
也有慙均化歸於二八讓德明乎再三所以其道不窮厥
見斯在驗率舞於百獸想同和於四海如其樂正非關自
衛而來儻俟風移有異從周而改愔愔不極杳杳作迷俄
將復矣抑又揚兮夢周公而不見想聖德而思齊聞斯行
諸厥不踰矩感心駭耳視何其觀悠然而往三歎如在夫

寥天倏爾而旋萬籟已吟於九土詎忘味於三月諒永懷
於千古幸賦韶樂之遺音美哉尼父

蠡山廟狀

范大夫廟在龍陽縣之赤山山接沅江縣東有湖古名赤
山春夏水遶之一云天寶六載巡使蕭子寶改山與神同
名今民庶憚其靈罔敢呼者廟後倚高山前臨湖水山卽
峯巒疊疊觀如隊羊水卽綠漠雲夢章華之洞澤其廟古
與禪林臺同爲一院乃有長松巨竹豫章雜樹烟霞鬱茂
旁有渚名南浦居人列牆而住徑帆往來無不湊者向南

二里餘有巨石數十遍臨湖水大者狀如宮室如舟航繫於灣島名曰石碑石畔有潭秋冬不乾號橫潭池夏日洪濤洶湧魚龍之所會沿崖有路通行上有垂藤古木鳥獸所居崖岸數里遠望如霞西望隔湖平田數百畝中有古城俗呼澥湧城林木森聳每春水泛溢嵐翠湖光烝祠宇按郡記云卽楚附庸君城也廟北去太湖五里餘有上壠連山脚而截湖如堤防上有一柱冬居壠上春夏迴在水中名繫馬柱廟無碑記相傳神以光宅二年臨北境時見乘石牛巡山擇地至第三壘曰覆盆壘上有豫章盤根

數丈垂枝下埽其地神於此置廟或云貞觀以來曾蒙國祭禪林臺有殿宇佛事悉皆開元中建立咸通十一年二月前使塞中丞施金帛建廟院

韋昭度

昭度字正紀京兆人咸通八年登第乾符中累遷中書舍人從僖宗幸蜀拜戶部侍郎中和二年以本官同平章事兼吏部尚書授司空遷太保兼侍中昭宗立守中書令封岐國公王建攻陳敬瑄於成都詔拜行營招撫使還爲東都畱守景福二年以司徒門下侍郎復爲平章事進太傅

後爲王行瑜所害贈太尉

元中觀瑞石賀表

伏以萑蒲嘯聚車馬省方天災流行國家代有陛下下成
湯罪已之詔徵王者有征之師顧彼兇妖卽當殄滅清平
旣彰於嘉兆幽贊爰覩於秘文赤雀銜書貺豈同於天上
元龜負卦慶難比於平災况因宗室齋醮之辰仍有祥光
跳躑之瑞其爲感現可謂丁寧

又賀瑞石表

伏自翠華南指黃道西分山行則六鳳翔軒水渡則雙龍

負機劍飛峭壁芝秀行宮祥文泛木於湘川麗日交輝於
蜀國蓋由聖神所祐謙抑不居遂令感動元穹發揮厚土
青羊故里精思盤石之臣白馬新蹤默啟靈輒之篆仙家
祕密景祚延洪周旋六字之中契合千年之運魏代之始
營宮廟玉璽效祥舜朝之流眄庭除金車迴出方於貽疑
難繼斯文

請復李克用官爵表

賞功罰否前聖之令猷含垢匿瑕百王之垂訓是以雷解
而義文象德網開而湯化歸仁用彼懷柔式存藝範上自

軒農之代下臻文武之朝罔不允洽寬宏以流霈澤况國
家當德祖守成之日憲宗致理之時車軌一同桑麻萬里
燭龍外野悉在梯航火鼠窮郊咸歸正朔然猶王承宗擁
兵鎮冀詔范希朝討之仍歲無功卒行赦宥而又朱滔以
幽州之眾結田悅李納王武俊之強遣馬燧等征之不克
旋又寬之以累聖之典謨睿哲大朝之紀律文明非不欲
厲彼風驅快其電掃然且考春秋之義稽楚鄭之文或退
而許平或服而更捨存於舊史載彼新書李克用代漢強
宗陰山貴允呼吸而風雲作氣指揮而草木成形仰天指

心誓獻秩訾之首伏弋毆血屢親都護之營所謂勇多上人自匪窮來歸我及陛下聖考懿宗皇帝之朝彭門失守親驅銳卒首建殊功而先帝卽位之初渚宮大擾復提義旅克靜妖氛其後封豕長蛇薦食上國繼以子朝之亂皆因重耳之盟保大朝之宗祧垂中興於簡冊蓋聖主之御天下也有勲可書有績可載宥過不忘於十代念功豈止於一時天高聽卑請事斯語且四海之內創痍猶殷九貢之邦綱條未理昨者遽起邠岐之眾尋已退還又徵燕薊之師倏聞內變出於饒饋失職資扉絕供致此投戈是乖

借箸蓋下計之未熟非聖謀之不臧儻宸斷重新天機間
出錄茲誠款散彼師徒虛其舊念之懷待以如初之禮臣
等所議實在於斯抑又聞往者漢將趙充國欲因邊境衰
弱出兵擊之是時魏相上書盡陳利害且曰恃國家之大
矜人物之眾欲見威於敵者謂之驕兵兵驕者滅非但人
事乃天道也又曰臣不知此兵何名者也兵出無名事乃
不成漢宣納之竟罷其伐伏惟皇帝陛下鑒往古用師之
難採列聖遷善之美恩加區宇信及豚魚則臣等不勝懇
願況今汴魏猶難幽定方困縱遣之調發豈能集事虛行

號令徒召寇讐將以勦人非惟辱國且黷戛斯舉勤王之
眾推效命之誠未能虜騎獨攻所望漢兵同力令茲數鎮
奔命不遑難致濟師恐又生事諭其漸當暑熱非利戎旃
悉力頒霑遣還蕃部重榮陳五郡之卒益謹關防王珙振
兩河之雄更嚴旗鼓然後獎其上表哀以自陳錄彼前勞
責之後効微神爵之往典還日遂之故封諭其已斥王恭
不使更疑晉帝凡百臣子實切乃誠其克用在身官爵並
請却還仍依前編入屬籍

韋蟾

蟾字隱珪下杜人大中中進士徐商辟掌書記咸通十四年官御史中丞終上書左丞

請禁托故請假奏

應諸州刺史除授正衙辭謝后託故陳牒請假實爲容易自今後如實有故爲眾所知者三日外不在陳牒之限應內外除官入京合便謝如有犯條章頗乖禮敬自今已後望准故事如未朝謝須俟於都亭驛如違臺司勘當申奏郎肅

肅咸通中官大理司直盧龍節度衛前兵馬使

甘泉普濟禪寺靈塔記

故甘泉禪院大師諱曉方蘇州常熟縣人師事五泄山靈
默大師慈悲以濟物勇猛以化人橫身塞河決之波舉手
正山岡之勢碎裂魔網高張法雲得岸拋舟不師文字上
天燒尾別創風雷方岳公侯連城守宰偃風渴道靡不皈
依百草滋甘露之芽三獸極淺源之渡皇哉魏乎則置院
之碑詳矣咸通十一年三月十日遷神於此山報齡七十
七僧夏五十八門人法順等肇建靈龕於院西南百步盤
龍山首焉咸通十二年歲次辛卯閏八月盧龍節度衛前

金史卷之三
兵馬使前朝議郎試大理司直中山郎肅記

柏虔冉

虔冉咸通時官撫州兵曹參軍

新創千金陂記

撫州刺史渤海李公一日無事理舟汝水泝流而上顧視
原野而歎曰焉有沃壤如此而不富於民耶有田戶鄒稜
跪而拜曰稜臨川之小民老於農者請以利害計於使君
願申其說公曰然因得盡搜故事得華陂舊基焉稜曰華
陂始於上元在大厯中有若顏魯公亦建土塍陂尋亦廢

塞在貞元中有若戴公置冷泉陂其跡尋荒在太和中
有若杜公修置不成咸通五年七年有若皇甫公有若鍾離
公相承八十餘年皆儀圖其地卒不能就公曰不然吾試
爲汝成之於是究其源度其地鳩其工諭其民咸樂之
九年八月鑿冷泉故基自文昌橋直抵南洲鋪上口凡九
百七十餘丈接汝江皆沙礫排窒微有其趾於是畚鍤旣
備併其工而開鑿乃浚其洫乃高其壩土與江口平盡出
其沙與積壤縈束盤委望之若帶焉過報恩寺趨文昌橋
下透隴畝而分其溝塍綺錯鱗差二十餘派陂偃五所以

節水勢公又於其上橫截汝江置千金陂南北百二十五丈斬木爲橦疊薪爲澤間以巨石而絡之江水小長陂則蹙其水丈餘而入於冷泉之新渠奔流貫激通舟楫之利利於窮民走文昌橋北沿流三十餘里灌注原田新舊共百有餘頃自茲田無荒者民悉力而開耕爾後又不可勝紀其頃畝矣先是荒廢陂水不入仰天雨積潦而溉之苟旱暵不雨苗則盡稿是臨汝長寧長樂三鄉之民固無望秋成而輸王之稅不減他戶窮民焦號無所控訴至有鬻妻傭女其苦甚矣嗚呼不有天意將大拯於撫民則公曷

莅於臨汝耶曷成於千金陂耶民咸聚而謠曰公倖景城
民蘇南皮南皮斗門厥績今存在昔河流西走燕魏民因
隄防日憂理水舟楫壅遏爲弊仍歲公作斗門分水之勢
亦不役民荷公之制又曰公作千金撫民惠深陂水沈沈
樂乎人心我田不荒我苗如林憂公之去誰其嗣音十年
夏新陂成公召郡從事及賓客載酒張樂觀陂以落之由
是軍民無少長繫公之德賴公之惠因錄其績聞於廉使
請詣闕借畱引冠恂故事而聲聞朝廷爲上郡之政首迨
十一年夏公秩將滿懼公之去惜公美績恐汨於後錄事

參軍衛宗卿臨川令陸愬都押衙李莊都虞候吳敦實子
糾候讓勾覆王贊洎州縣胥吏等羣進眾拜於庭曰公之
利臨川其績彰彰厥功懋哉而千金之創特異於古雖汝
南何敞開銅陽以利物邵侯斷洪流以溉田無以過也不
刊於石則撫人何所仰其德哉眾有議曰軍倅柏虔冉早
踐文場善屬詞筆宜勒其事虔冉才非博古學昧通經而
繆爲賓吏纂我公之懿德豈能備乎辭不獲免因操筆覲
縷事志於貞石愧無文飾咸通十一年歲在庚寅六月壬
午朔廿八日己酉記

王武陵

武陵字晦伯咸通時官倉部員外郎

宿惠山寺詩序

戊辰秋八月吳郡朱遐景自秦還吳南次無錫命予及故人竇丹列會於惠山之精舍是時山林始秋高興在目涼風白雲起予坐隅逍遙於松檜之下偃息於盤谷之上仰視雲嶺俯瞰寒影夕陽西歸皓月東出羣動皆息視身如空元言妙論以極窮奧丹列有遁世之志遐景有塵外之心予亦樂天知命怡怡契合視富貴如浮雲一歌一詠以

欽定全唐文卷八百五

三

四

五

紆情性夫良辰嘉會古人所惜序述不作是闕文也山水之下景物秀茂賦詩導意以紀方外之遊

吳畦

畦山陰人第進士官諫議大夫以諫討河東出爲潤州刺史

唐贈左散騎常侍汝南韓公神道碑

長河北控太行東隅粵有輿壤厥爲全魏其中土宜耕俗最淳孝子忠臣義夫節婦觸類可觀比屋可封地勢自然物理斯在是以代有將軍稱義兵控北敵之咽喉扼南燕

之襟帶歲月鞏固朝野賴之至於命帥臨戎非賢則德或

失其統馭則禍必起於蕭牆昔廬江公承襲一方子孫三

世逮及衰季始墮弓裘四人切弱一作弱苦之音六郡當舉

羸之患乃督三軍之衆千萬同心闕五字英雄應選闕五字僉

命我公雄仁蘊長者之譽德負不孤之聞語其力則五丁

比肩較其藝則三傑齊價秉磊落大度挺昂藏偉才河山

之精銳貅之勇表率魏邦憑懇魏人天道照臨宸衷慰悅

輶使磨至軍務克諧金貂之峻秩負來烏府之崇資不踰

期月爰登魏博節度至三台之重公感歎彌殷遙駐一作馳

罔極之誠驟冀追崇之寵天子乃嘉其大孝錫以珥貂用副孝思式贊幽壤公既獲拜嘉命念哀榮無常若不卽以刊之貞石無以闡將門之業無以傳曠古之名因授以賓徒俾詳其事繫吳畦序焉公諱國昌世係汝南人也其先與周同姓姬氏其後苗裔事晉得姓於韓故曰韓武子武子世本云萬生遜伯遜伯生伯簡伯簡生子與子與生獻後四十世有韓厥從封爲韓氏厥孫於景公三年屠岸賈將作亂誅靈公之賊趙盾趙盾亡死矣欲誅其子趙朔韓厥止之告賈賈不聽厥告趙朔朔曰子必不能絕其事賈

誅趙厥稱疾不出卒全其孤春秋書之至於秦晉會盟楚漢襲服綽有勲烈華然功庸迄於我唐不絕流派公累代魏將剖分符節曾祖魏博節度押衙祖朝魏博節度押衙兼臨清鎮遏都知兵馬使檢校國子祭酒兼侍御史烈考魏博節度押衙充都知兵馬使檢校國子祭酒兼御史中丞公之爲人也天假樹忠神符抗節好謀而斷知幾而明約言有常敏行無玷以孝弟成其性以文武全其才少卽承祖宗之餘芳長最好孫吳術讀黃石書指力爭爲末燼笑氣吞爲細事嘗慕攝衣決勝坐籌出奇軍中少年靡不

取則時值王室爲難邊疆舉烽公乃拔自偏裨擢於列藩
尋擊賊有功乃行賞酬庸論功載筆是時洋溢懋績充塞
宇宙心服軍旅名垂竹帛藩翰可期芳訊繼臨密詔垂下
公倜儻成癖優游素深時雖料敵摧堅不廢吟風嘯月執
堅守冑銳氣難奪自思今若終天力絕不顧骨骸後時願
乞陪臣不越吾土遂脫輻謝病掛冠養高搢紳有聞物論
稱平尋以牽復舊位脫履王畿監止於方鎮懋績崇榮其
孰能宗歟公始及裨副載分劇職入奉訓齊之令出揚整
肅之權推公而直若引繩行己而平若止水言不好弄服

不好華卷舒自得於時宜喜怒不形於顏色崇善觸邪柯
葉不遺紫髯最冠於羣公青眼靡遺於眾卒藹若聞望諠
然令圖公非獨王事有作復乃闔門立程稜稜而廷訓惟
嚴察察而鄉義尤峻先教之以仁義後導之以詩書諭雍
容禮讓之節示惻隱慈愛之心馳騁田獵雜服詭辭趨若
仇讐屏如蝟螯肆我武勇平成以賴適方一箭發而號猿
猱三尺舉而吼龍虎矛盾山立旌旗血融言其壯則扛鼎
拔山顧其勇則馮河逐日七十城而應敵下四十萬而乘
時坑此乃用武之克捷行師無不利者若以瞻雲望氣一

否一臧辨成敗之機宜鑒吉凶之休咎則武非文而不備

文非武而不揚實共濟而相恤無殊塗而別蹤矧予纔立

名業

闕一字

仗弓劍者也予之身甘爲不肖孜孜以未墜之

緒力

闕一字

於命子者其庶幾乎議者乃赧赧絕詞唯唯而

退今

闕九字

僕射果自

闕四字

德

闕

公昔之

闕一字

習非偶然哉

武宗蒞祚初年逆賊拒命天討薦加常從廬江公以勦叛

廬江公異公英勇以前衝統眾弦道係將累日公度其軍

勢相以人心雖機上之可期若在彀中耳謂廬江公曰魏

師以久不振旅時無恒心今乃越境而出若非肅齊則衝

敗莫制若悅豫其情則前驅不踵公請審其向背妙以機
謀督餽餉之心敦戰伐之道在爪牙者却駢羅於後如市
人者皆跨列於前自然表裏相應寬猛得中此勇之大勢
也

一作故可係時時必
偃其干戈翹下闕

廬江乃俞良策卒成大功鎮山東

壯武之聲擅日下勤王之効莫不由此言無謬歟公雖初
心不求朝拜藩府所獎符竹爲先遂遷攝貝州刺史兼本
管劾奏御史中丞公旣解戎韜俄從郡政三尺之綱條不
紊四知之敬慎惟敷瘡痍旣起於沈滯勞逸復均於疴瘥
雖黃霸行教冀遠立誠求之北方孰以優劣公忽不自憚

曰久從軍中心無逸

闕一字

冒馬勞金瘡之績竊蹈忠履信

之名稼穡少知艱危歷試不冒榮於好爵不伐

闕二字

殊勞

避授鉞於他邦止建侯於我土今齒髮云邁桑榆足悲胡
可尚存碌碌勞勞不知閒居適志遂乃命納軾旗終賁林
野文言曰知進退存亡而不失其正者其惟聖人乎以大
中六年七月十二日寢疾薨於魏州元城縣德教里之私
第享年六十有六以大中八年二月二十五日殯於當州
莘縣修善鄉依仁里至咸通二年六月二十六日贈左散
騎常侍夫人清河張氏同時月日贈清河郡太君有子三

人長曰君雄魏博節度觀察處置等使檢校尚書右僕射
兼御史大夫仲曰靖魏博節度押衙兼部從檢校太子賓
客兼侍御史季曰楚魏博節度押衙兼刀斧將檢校太子
賓客兼監察御史噫公以德符陰騭慶延子孫世居封贈
之尊蔭極人臣之貴建碑道左顯褒冥途哇序說爲銘銘
曰

堂堂聖朝烈烈文明仁以配德德以延英社稷康人將帥
惟精欽我魏疆爲河爲方厥賦以上厥土惟良異物旣產
賢臣復彰擾以六韜峻以五常弧矢不幹忠孝爲光少齒

得志勵節勤王扼腕不斷瀝胆可嘗虬龍屈盤鵬鶚翱翔
平寇計高伐叛名揚運籌毳帳決勝沙場功業有勲朝廷
議勤加以羽纛陟以親軍賜以好爵固以藩身得路我土
保祀我裡貌貅舊統畏敬無垠符竹嘗剖惠愛猶存訓子
文行果極名臣罔極知報帝命爰臻錫以峻職飾以王綸
褒榮令嫡激勵愚器褒崇旣尊典禮斯陳昭彼懿德勒自
貞珉

欽定全唐文卷八百六目錄

新文豐出版社藏書

蔡詞立

虔州孔目院食堂記

侯圭

割鴻溝賦

東山觀音院記

崔瑄

論令狐滈及第疏

潘稠

請移真源縣就太清宮奏

張魏賓

唐故太原郡王處士墓誌銘

并序

張雲

論令狐湫不宜爲左拾遺疏

復論令狐湫疏

周鈐

南郊享壽星賦

歐陽玘

野人獻日賦

張喬

對燕弓矢舞判

沈畋

贈同昌公主衛國公主制

邵朗

兜率寺記

李伉

對舉方正者判

五龍堂記

欽定全唐文卷八百六

蔡詞立

詞立咸通十三年官虔州孔目

虔州孔目院食堂記

京百司至於天下郡府有曹署者則有公厨亦非惟食爲
謀所以因食而集評議公事者也繇是凡在厥位得不遵
禮法舉職司事有疑獄有冤化未洽弊未去有善未彰有
惡未除皆得以議之然後可以聞於太守矣冀乎小庇生
靈以酬寸祿豈可食飽而退羣居偶語而已况虔居江嶺

地扼咽喉有兵車之繁賦役之重苟一物爲害則萬姓何辜一綱不提則七邑何守同舍諸公得無屬意焉小子承乏每慙尸素志求短拙憂心忘餐或有公事之稽畱獄訟之寃滯六曹之臧否百姓之慘舒農桑之失時鄉閭之蠹弊聞見所未及才智所未臻希會饌以言之共裨風化院食堂舊基圯陋咸通七年夏前太守隴西公遇時之豐伺農之隙因革廨署爰立茲堂環之高樓翼之虛楹有風月之景花木之陰無燥濕之虞墊陷之慮聚於此者得無愧焉處廣廈宜念巢居露寢者食兼味宜念糊口甌塵者夏

清涼宜念曝日而耕者冬溫燠宜念卒歲無衣者苟用心如是則日食萬錢無以爲愧豈惟公膳哉自叛建之後於今七年未有紀述深以爲缺小子伏役之暇好讀書爲文雖顧不才聊用直錄咸通十三年五月三日記

侯圭

圭僖宗時人

割鴻溝賦

以割土開城去
存深跡爲韻

龍爭虎鬪兮萬象交奔鏃盡兵窮兮白日猶昏潛豹畧而久困割鴻溝而兩存臨屹屹之重關平分海嶽指遙遙之

一水畫斷乾坤秦之末世也鹿走中原人殃下土天垂不定之氣代作分爭之主皆欲呵叱羣類鞭笞萬宇或功侔壁嶽埽氛祲以將清或力並觸山缺穹昊而未補爭馳羽檄欲定雲雷共假長山之隔閭請如橫漢以昭回劈六合以中裂割八紘而半開於是對戢雄稜俱停執馭盟高岸以斜指約中流而內據霜戈雪刃擁雲陣以東歸火幟虹旗扶日輪而西去險隘瓜剖沉深帶橫兩曜而寧休暈蝕重宵而未落欒槍晉魏周韓出地表而共宗函谷燕齊楚越徹天涯而盡屬彭城池塹彌堅人烟漸隔瘡痍詎息於

餘畧兵甲俄循於舊跡孤軍外鎖截南北於千城萬馬重
來併華夷於一擲由是羣陰再合霆霹交侵强者功淺弱
者機深空欲限溝洫之迢遞閉關河之阻尋分地理而不
分天理割波心而不割人心及夫垓下之劍不還江上之
師莫遏始知鳳閣之難處徒想鴻溝之獨割至今京索之
原古津空闊

東山觀音院記

廣明初梓州浮圖祠大小共十二慧義居其北兜率當其
南牛頭據其西正觀距其東上臨絕壁下瞰長江青靄屬

天織塵莫及巉巖險峭孤標勢盛諸寺讓焉自儀鳳元年
置本號清居尋改真觀凡一百六十七年會昌中例從毀
廢大中時內大德僧知元與工部李侍郎同議興復功業
未就屬蠻獠猖狂將犯西蜀有三藏僧洪照召諸寺僧智
海等於舊基置降魔壇號曰無能節度使尚書獨孤公因
給牒置院利人信施洎至飛木輓石僦徒募工樹立新規
因循舊跡制未周歲而及半創觀音像堂三間南邊佛舍
五間山頭大閣三層七間房廊厨庫門廡十五間皆盡雕
飾之妙宏壯之麗瞻仰崇峻依歸者萬計舊傳塼墻十三

層歲久傾欹忽遇風雷遲明卻正時以龍神扶掖之異今
餘其址又有石龕四五兼鬼子母下臨方泉里巷以高襟
之饗祈禱者衆頗有靈異故李公溪石前身之說詩碑尚
在洪照姓鄭氏號州盧氏人幼詣清涼金闕寺鏡公處出
家竹林寺用公處具戒壯歲就興善寺則公處受灌頂五
部大法明五天梵字太和七年遊蜀初住綿州大安寺洎
返初服再從剃落因隸縣州開元寺置上方轉輪經藏十
年秋川主尚書韋公請居慧義般舟院因得重新正觀焉
常以真言祛邪逐祟呪水治病救人不可勝數咸通十三

年夏六月委化於般舟舊座壽七十八臘五十五建方墳於東山梓州諸寺山院陳迹慧義則有庾開府王子安李北海趙蕤處士碑牛頭則有閻邱博士均嚴員外碑南禪院應天院則有李員外商隱淨光徹大碑圓梵寺兜率寺則有崔相國楊相國記靈泉院法社龕則有王校書魯記皆雄詞健筆扶異挑奇相繼馳名於諸夏矣惟正觀舊無紀述照公門人從文清標正直勤苦修持承襲巖栖宗依明教亦得其三密心印乘間錄精宇之興廢先師之行業劇懸崖五尺請書圭辭不獲命書曰舊真觀寺今觀音院

元始其意照成其志文終其事辛丑歲正月二十七日丙子刻

崔瑄

瑄咸通朝諫議大夫

論令狐湊及第疏

伏見新及第進士令狐湊是河中節度使檢校司空同中書門下平章事令狐綯男舊名壽改名湊竊聞項年暫曾罷舉自父當重位而權在一門求請者詭黨風趨妄動者邪朋雲集每歲春闈登第在朝清列除官事望雖出於綯

取捨悉由於高喧然如市傍若無人威振寰中勢傾天下
及綯去年罷相出鎮其日令孤高於禮部納卷伏以舉人
文卷皆須十月已前送納豈可父身尚居樞務男私挾其
解名干撓主司侮弄文法若宰相子弟總合應舉卽不合
繼絕數年如宰相子弟不合應舉卽何預有文解公然輕
易隱蔽聖聰將陛下朝廷爲綯高家事伏恐奸欺得路孤
直杜門非惟取笑士流抑亦大傷風教伏請下御史臺子
細推勘納卷及取解月日聞奏臣職當諫署分合上聞

潘稠

稠僖宗朝亳州刺史昭宗乾寧四年加金紫光祿大夫檢校工部尚書

請移真源縣就太清宮奏

自大寇犯闕之後羣兇誅殄已來大小寇逆前後一十八度欲犯太清宮或迷失道途或龍神示見終挫兇計宮城晏然所庇護居人不知其數請移真源縣就宮安置

張魏賓

魏賓咸通時鄉進士

唐故太原郡王處士墓誌銘

并序

太皞爰興木德啟姬周之運靈王少海緱嶺表登仙之慶
故王之命氏始乎太子晉晉生龜襲封於太原今爲郡人
也廿四代祖襄仕晉爲大將軍以孝敬動天粲今國史流
祚萬世忠貞顯隆軒冕官常有國皆有不復備列於斯誌
君諱仲建字彥初卽將軍之遠派也曾祖潏迨皇考坤咸
以博識著稱委簪纓有羈縻之患故遁俗不仕府君乃坤
之次子矣幼而廉慎長而剛毅偉其貌而孝於家睦乎宗
而潔諸已訥言敏行金穴山藏用捨無遺鶉駟一致誠明
諒直清簡洽聞涵穎銳於鋒鏑極逍遙於大道武齊樂伯

劒敵莊周縱雄辨而嶰谷潛暄攄麗藻而綺霞爭秀志高
氣遠觀象紫微當豹隱之餘芳應處士之嘉號非公而孰
能與於此哉識者以爲懷寶不耀至信自彰探老氏之希
夷固全真於物外者也方欲鍊形羽化漱液丹霄存神於
罔象之中抱一於杳冥之內將宣平生之大節豈料尋師
未遂步水俄侵賈生之鵬鳥遽延排寢之搏膺斯及嗚呼
春秋六十以疾不間終於河梁之別業公娶清河張氏乃
班孟之名家胎訓之清譽蘋蘩繼代中饋祖禰之母儀耳
故能有子一人焉曰知教實令嗣也自齠髫壯歲所好所

慕已脫落常態及成童伯仲以孝經授見末章有裂骨之痛親屬以爲曾閔之疋俾專就養克扶竭力之仁捧藥問安式展因心之孝銜酸茹恨泣血穹蒼擗地捫心幾將滅性於廬次悲夫繼夫人安氏淑順閨閭亦盡敬姜之禮知教乃抑情斂涕罄彼稱家克已勵精冀終大事以其年歲在乙酉十月己酉朔廿二日庚午至孝由是坐踴無時徒跣備先王之制列儀旒自三城護府君之神座歸葬於河陽縣豐平鄉趙村之北原附大塋啓先夫人之舊窆合祔於斯禮也尚念鍾岳圯毀江甌摧頽厯數有期堙滅無紀

請編是誄於泉壙魏賓嘗游館穀竊覲徽音直筆其辭用旌孝子之慕孺乃作銘云

王氏盛業姬周奕世降及仙才浮邱以濟元偉孝弟仕晉文帝義烈汪洋忠貞昭晰以至於公克揚嘉裔猗與府君以大其先嗟嗟夫人柔順其賢孝子號天哀親棄捐感靈陶鶴相彼何阡峯巒歸氣魄聯綿尹默之悲涼奚及陸機之雅賦依然檜柏秋月春松暮烟庶山川之不易標誌誄於他年

張雲

雲字景之一字瑞卿咸通朝官起居郎歷興元少尹

論令狐湍不宜爲左拾遺疏

臣伏見今月十五日勅除長安縣尉集賢校理令狐湍充左拾遺者湍頃籍父威不修子道干權黷貨有口皆知據其輿論之所咨嗟宜於霜憲之所破碎豈可令捧近日月飛翔雲天此則有罪而反榮是乃無辜而可警也伏惟陛下以獻文繼代孝德承祧臨天下以至明示天下以至信有善必勸有惡必懲分別昭彰使人不惑也今湍爲諫官是惡人得位善人必疑矣陛下何以執信行令使萬方從

化乎漉麻衣如雪干弄未光穿緣穴鼠之墉以欺其父出
入吞舟之網不畏於人至於朝廷命官公然請託不封殿
最無取賢愚但擁富貴卽爲高第遂使堯官三載黜陟有
繫於金錢孔教四科取舍或由於聲色且令狐綯進用李
琢首亂南方賊罪流聞遠近昭著使天下兵戈徵斂未有
已時而南安舉城化爲凝血矣陛下每臨朝聽政語及南
安事或至掩泣未嘗離心上欲收復土疆次欲誠勵臣下
琢頃以典郡賊穢廷臣曾有論封令狐綯比竟用之由漉
有納賄故也李琢之罪旣正刑書則舉以致戎者是誰之

故此乃目前可驗天下皆知臣豈苟緣愛憎妄有論列高
爲人子陷父爲惡豈堪鳴玉曳組爲陛下諫臣乎陛下必
欲推寧僭之恩以寵於高豈不念南方赤子流離死亡豈
不念州郡徵歛生人受弊豈不念蔡襲酷沒豈不念國計
空虛凡此數條盡高之由也臣頃事先朝任太常博士以
高專恣威福勢傾朝廷大中十三年五月二十三日已進
密疏直啓九重先帝且務苞含微臣亦蒙全宥幸得要領
獲事聖朝臣今若顧惜微疆寢而不奏是臣不以事先帝
之心事陛下也生則罪重死有餘辜但獲上聞聖聰一悟

睿旨雖當鼎鑊亦所甘心伏望改授瀉一官以息羣議

復論令狐瀉疏

臣一昨以令狐瀉負議聖朝脫身疎網因緣僭祿抗奏上
論伏自疏奏以來二十餘日未奉明詔異議喧然臣孤立
自持當此大位忽異恐事生不測先及臣身則一去帝城
千里吞恨將來拜疏何略聞知臣今再上聞者但以勢不
可默也瀉之取錢豈令臣見臣只以貪僭之譽布在人間
惟受傳聞卽有論列先朝獻疏已具指陳還緣此子竊父
威權爲過不少而外人言論上聞於天所以先帝不加責

金史卷之二十一
於微臣以言之無罪不然令狐滈外倚家門之權內連鄭
顥之寵臣尋粉碎於先朝矣今日豈得全生更爲陛下明
言乎令狐絢爲先帝權柄大臣獨擅恩澤職當調護國本
訐謨皇家陛下序屬天宗躬爲長子先帝親觀齒讓目覩
溫文大中十年十月八日勅右諫議大夫豆盧籍刑部郎
中李鄴並以本官充夔王已下侍讀此令狐絢交連帝戚
位冠鼎臣端坐中書作何行李陛下受天照命羣臣定策
宮禁之事則臣不知但欲冊夔王便可知絢臣節況濫舉
李琢致其毒流生人使先帝貽厥之謀不及陛下好生之

德未免憂勤絢只合辭榮乞骸席藁請罰何顏更令不孝
之子濫求官榮事體既乖人情實憤李琢本無吏道惟有
貪名瀉旣身挫人言琢官實由賄得絢拔自羣小分符交
州琢果大肆兇殘處置杜存誠父子取怨溪洞闔境亂離
其坐罪貶官絢猶專爲掩覆依前要用更與壽州蕭倣駁
議旣行李琢罪狀轉驗琢不自澄省指斥王廷按獄司窮
重重貶削分務未久又除宋州直至絢罷相權琢始廢居
東格無私宰物當如是乎若令狐絢以琢一時敏辨以有
公才用琢如或不知在絢未爲有過豈李琢前僭未塞後

惡乃張知是罪人橫身庇護則絢之舉吏自與心違漕之取錢何須眼見衆口紛紜號爲白衣宰相朝廷設進士之科本求才彥鎮其浮濫屬自宰臣陛下御極之初大臣儀刑百辟豈爲絢言出鎮漕便策名放榜宣麻相去二十三日絢旣公然進狀請試春官漕則元在京都不經舉進明言拔解傍若無人漕爲宰臣之子不患無位且合簡身慎行以成父業有何急切如此攫挈使天下孤寒人人怨歎謂之無解及第實則有耳未聞不懼人言一至於此臣若悉書漕過方罄南山之竹恐未盡也臣家惟有童稚更無

兄弟自傷側足單居但思引領獲罪令狐絢身榮上相位
冠通侯十年桃李之陰兩葉公台之貴煦能生物怒可移
山臣子豈無常人之情有何苦切頻將單脆微蔑之身與
強家立怨立敵自取傾危也直以曾將瀉事上聞先朝瀉
出網羅偶逋清憲更欲玷黷皇化參侍玉墀人懷怨心而
敢指斥是欲以大中威福復行之於舜日也獨臣將經是
事豈得逡巡止可碎身權豪之門不可負陛下設官分職
况絢有批政亦何阻直言以其前章猶未明切聞瀉黨欲
謀害臣恐不及繼言便至貶降臣又思令狐絢負先帝之

事陛下不知悞我聖明由臣慙怯今再得指陳瀉事啓達
聰明臣於妻子官業已無愛惜矣用舍之宜一俟聖裁

周鈐

鈐懿宗時以詩賦著名累舉進士不第

南郊享壽星賦

玉露初降金風正秋有壽星之發彩出離方而若浮太史
於是奏時令贊天休謂三光之丕顯蓋萬乘之勤修天子
乃命有司灌鬱鬯登靈壇以歲事敬南極而延望當其氣
凝霧寢烟消霞曠循大象之昭回見孤光之寥亮月來歲

往常居赤帝之前目擊心祈空仰碧霄之上所欲精誠斯
感肝鬢潛交矚神靈兮心馳箕斗奠椒獎兮酌滿陶匏事
異乞言殊養老於東序祭惟合禮同祀月於西郊時也陰
陽正位晝夜平分思薦祉於人壽遂大亨乎天文則知秩
天宗用郊祀斯祭也象在角亢壇當戊巳月皎皎而清漢
波流夜蕭蕭而白榆風起齋心旣潔蘋蘩之薦已申壽域
先開龜鶴之年可俟祀事旣道之南恍惚兮光臨俎豆依
稀兮氣動烟嵐由是見星躔之不爽知君德之相參彼牛
女迢遞以增思參商隱見而差失處圓靈兮徒分炳煥於

敬授兮未爲貞吉曷若我冠衆星而稱老當三秋而迴出
既有補於乾坤詎廢書於時日是宜執犧象展鷄彝召馮
相而司厯命祝史以陳辭如此則所謂一人有慶而兆民
賴之

歐陽玘

玘咸通十年進士

野人獻日賦

以和悅日光情
意君宇爲韻

昔宋有野人負日之暄兮獻君不知天下流光以所見爲
未見不信人間委照以所聞爲未聞當其愛景稍融農民

乍悅謂國內無有謂山前自別恐若木之光遽失慮扶桑
之影將滅於是耒耜潛棄耒耜鉏耒暫輟指天路而貢誠適君
門兮效節紅輪在上無欺皎爾之心赤羽相隨可驗昭然
之說乃曰臣生於隴之畔長於隴之旁朝播其穀暮植其
桑絲不得上體粟不得充腸以藿爲食以蓑爲裳體凍乎
雪骨寒乎霜因取適於中野遂潛舒於太陽煦不厭暄不
忘而恐率土之尊未識民間之樂一氓之賤敢私天外之
光所以貢其所知陳其所覩願日之彩致於君之館願日
之輝及於君之宇南畝而曾無寸澤猶悅於身東方而幸

有餘明敢忘於主主乃憫其甚樸嘉其至誠一則警於驕
逸一則念及黎氓安知萬室豪家更有追歡之意六宮長
夜仍多縱樂之情嗟夫人各有生生而有異爾豈不以種
植爲業逋租爲事上或逼於狼政下或臨於虎吏汲汲爲
心營營爲意遂使朝光不辨誰知勞者之情暖景爲祥忍
奪生民之利乃知貴之逸者有之何稼穡而能知賤之至
者不一則陽和而豈失彼徒見其夕入而因忘其曉出三
尺之童子猶嗤何以日而獻日

不見和
字官韻

張喬

喬池州人咸通中進士黃巢之亂隱九華山

對燕弓矢舞判

燕師國子以弓矢舞樂師巡列將撻之曰眡瞭
詔瞽師來臯

燕訓恭儉樂協詠歌君子以之侑食先王所以布政師彼
國子舞於公庭始合於文執羽籥而在列終奏以武觀弓
矢之斯張進退疾徐取六律以成節屈伸俯仰宣八風以
克諧始協伯夔之教自得周官之典眡瞭詔瞽旣訴者之
有詞樂師巡列何朴作之妄罰於此觀禮宜其緩刑

沈畋

改懿宗朝官知制誥

贈同昌公主衛國公主制

門下死生有命雖著於格言天橫難明豈由於定數每念
肅雍之德載經悲愴之懷疏土易名用申彝典故同昌公
主生知孝敬天錫聰明桃李凝華芝蘭蘊秀克奉公宮之
訓寧煩女史之箴洎結慶秦樓傳芳魯館蘋蘩潔淨環珮
鏗鏘不矜帝子之尊盡執家人之禮謂乎積善享彼修齡
驚電逝以霜摧致珠沉而玉折粉田蕪沒金榜淒涼荒沁

水之林園寢平陽之簫鼓哀情靡極縟禮宜加啓衛國之
山河擇周公之諡號式崇徽教用慰營魂可贈衛國公主
兼賜諡曰文懿仍令所司擇日冊命主者施行

邵朗

朗懿宗時人

兜率寺記

蓋聞三皇之時人本敦朴各守性命保其沖和金厥天年
化窮則已降及唐虞之代嗜慾猶淳家給人足不相侵伐
君君臣臣各理其職而已海內平一刑措罔施足而馳者

安於山鱗而潛者樂於水羽而飛者保於林胎天不傷者
耄得死苟無禍害之釁奚假振拔之門哉殷周已還戰國
萌動弦弧揆矢鍊甲鑄兵乃有強凌弱衆暴寡由是爭鬪
之患生殺伐之禍興矣雖老氏垂清淨之化仲尼用禮樂
之教莫能救也而苦海波湧愛河風騰害源弗祛心垢彌
悖重圍匝於三界毒焰延於四生乘時蕩滌建設航筏汲
引沉溺者惟佛世尊於是標六度之寶訓轉無上之法輪
作迷途之指南爲黑夜之明炬處濁世者何能濟哉但爲
三惑牽纏六趣淪陷頓而悟者萬無一焉粵有我東晉左

散騎常侍輔國大將軍太傅胡安定公得之矣公諱鳳字
世鸞才推國英德標人瑞出蕃入輔興事建功焯乎圖書
煥在南史其激俗尤異立跡惟能者可得而言之於戲胡
公辭榮不讓於二疎知足式於元老歷伐冰之貴攀定水
之宗悟萬法皆空歎浮生若幻以晉義熙二年正月捨所
居爲和安寺焉尊像端嚴塏廟宏麗由制而左香刹之盛
莫之偕也夫人九江郡太守呂公凱之女也柔明淑嫻姻
族推高配德宜家義諧琴瑟發無上願捨不住貲亦於是
日同捨西庄置五福寺焉殿宇嚴整高卑得宜迭經廢興

更名靈曜寺其五福舊額則移於縣郭之東山立寺焉和
安門接三衢途通百越法衆雲集供具日臻長夏講筵無
時暫輟燈然積代之明福贊無疆之休故得族茂千枝化
露來葉後嗣蕃衍不可勝言或以廉秀登科或以勲勞筮
仕剖符列郡遵問絹之清風鳴絃化人效馴雉之素履其
在空門持律行者二人二十三代孫聖壽寺僧令宣和安
寺僧清瑗並童丱出家弱冠受具以爲百億三昧無非度
門調伏身心梵行精密調伏心爲定慧調伏身爲律儀護
持第一如優波離受佛付囑比大迦葉行標法侶玉潔緇

林宗孫棲遁雲壑者凡數十門皆琴書自娛泉石爲玩與夫俛首下位者不亦高乎二律公洎枝孫輩凡若干人聚而歎曰我二十三代祖太傅公捨宅置寺綿厯歲時當武宗皇帝御宇之五年以釋教陵遲緇徒冗雜非一蕩滌無清化源初下明詔沙汰僧尼尋降勅旨毀廢寺宇則和安靈曜並隨而廢焉舊用碑銘一皆碎棄千載之後莫詳其由安可不紀於堅珉揚其往烈洎宣宗皇帝卽統祚六年以三教並行殊途一致有裨大化幽贊王猷重降德音再許置寺國朝大理卿溫公彰莅郡之日特表奏論恩賜禪

月之額有上首大德正白修大乘業得無畏輪行化未周
喜捨鱗積營構堂殿不月而成爾後尋復寺名其士庶助
成功德者名秩姓字者別有標錄此不更書今所敘述但
彰厥初立寺之由焉朗謝秩鄧江寓居蘭渚寺幸不以匪
才見託書事半讓數四堅請如初釋耒揮毫但慚荒拙銘
曰

美胡公山嶽降靈爰挺人英出鎮蕃屏入輔王廷德彌馨

兮

其一

美胡公爵貴祿優知雄守柔能捨難捨居成寶樓名

不朽兮

其二

美胡公桃夭黃實有堅其室同捐別墅圓明佛

日爰聚尼衆樓禪靖謚置靈曜今

其

三美胡公盛德顯融令

始罄終美宅名園鬱爲梵宮億萬子孫福壽永隆祚不窮

今

其四

李伉

伉咸通朝官吏部郎中

對舉方正者判

京兆尹舉方正所舉者槃辟雅拜有司以詭衆
虛矯奏請左遷

四方取則西夏爲樞九流待問東臺是急若舉不失德實

人所具瞻而肅穆清規崇嚴丹陛登清光於霄漢不違顏
於咫尺則當進退禮容孰聞槃辟雅拜旣無觀於叔氏亦
何取於鄒人有司上聞攸資伏念儻使廣成不遠應無北
面之尊綺季或存未屈南山之老試可乃已誰不謂然

五龍堂記

在天莫如龍龍之德佐天地養萬物百穀賴以生四海所
共尊者也社祭土稷祈穀國之重典也旣立壇以享其神
矣則龍之靈翔風灑雨澤枯槁滋稼穡可不嚴奠醑之所
哉余受命牧明人四月戾止六月大旱俾吏具香酒敬祈

於五龍之神有蜥蜴狀者躍入杯中飲酒復出緣器上顧
吏久之跳躑而去吏未返雨已大注由是生植茂遂闔邑
豐衍思所以崇祀事答神休者廼建宇爽塏依方塑像以
時薦饗謂之五龍祠堂云時咸通六年季秋之末也